

資治新書

二集

366.1
S4037
7

資治新書二集卷六

湖上笠翁李漁蒐輯 婿沈心友因伯訂

河工總柳料 人夫 錢糧 工食

督催栽柳牌

總河朱梅麓諱之錫部院義烏人

照得黃河悍激湍流勢若奔馬。禦險塞決。非掃閘功。每捲一埽。用柳動以千百束計。千里長堤。歲用柳料數且不貲。況伏秋河勢陡變。埽料在手。咄嗟之頃。轉危爲安。可以免塞決之費。即使萬一有決。埽料在手。旋決旋塞。不致正流日淤。旁口日豁。可以免塞大決之費。故必使生植之數。常有餘于採辦之數。然後可以源源相繼。不然而樹藝不廣。猝然有急。無術點金。縱有不竭之金錢。無窮之人力。亦不免束手坐困。故栽柳一事。竹頭木屑。似乎瑣細。而其實乃治河之第一義也。業經前部院暨本部院題請。責成各印官於河干按汛栽柳。分別多寡。照例勸懲。俱經部覆。奉有諭旨。乃今一年以來。報栽無幾。殊屬疎玩。應以違旨題參。姑行寬宥。以俟將來。合行申飭。爲此牌仰該道。即便轉行各州縣。云云。七年之病。三年之艾。急急圖之。

詳各臺

淮河紀子湘諱元
司馬紀子湘諱元
文安人

爲急陳夫食料價之積弊。兼籌便民利國之良圖。仰祈憲鑒飭行。以便遵守。事竊照卑職謫劣庸才。謬膺河防重寄。視事以來。恪守憲臺法紀。冰蘖自持。弗敢隕越。凡本署冗員。悉行裁革。本廳詞狀。一概禁止。恐蠹差擾害行戶。已出嚴示禁飭矣。廬州縣怠玩憲件。見設木籤催提矣。卽卑職出視堤工。往謁各憲。悉皆自備行李。不用州縣一草一蔬。不動驛遞一夫一馬。此固下吏所當爲。無煩瀆塵憲聽者也。惟有夫食料價二節。所關河工甚重。不敢不竭慮殫思。以求剔弊而興利。查夏鎮一年夫食銀八千四百餘兩。舊例州縣解廳。卑職轉解夏鎮工部。就近發主簿給散各夫以外。惟有中河夫食銀八千六百餘兩。三險歲修料價。係卑職衙門經理。責無旁分者也。但聞法令廢弛已久。其間百弊叢生。閭士民之公呈訪道途之輿論。誠有利于私而不利於公。便于奸棍猾吏。而不便于民者。不得不早議變通。以圖實濟。先就料價一項言之。按往例于每歲正月內酌發庫銀。每州縣先給二百兩。催各里辦料。陸續完交。俟估計具題。用過料數若干。照定例價銀撥發各州縣轉發里老。里老又分散花戶。往往有不肖官吏。視爲給還百姓之銀。以上賜下。不敢取盈。可以任意扣減。及入里老之手。又視爲百姓既捐之物。以現博賒。原置度外。可以借端

宦途格言
可銘座右

詳看語中
如此痛快
者絕少那
得不爲上
臺擊節

此等良法
人知其善
而不肯行
者以其不
利于官也
登料竟有
一官毅然
爲此得無
乎笑其愚

開除。于是辦料之花戶。徒苦敲朴于前。並無實濟于後。飲恨吞聲。莫之敢發。卽有仁慈各憲。念及于此。然
事無指實。何所據而加之懲創乎。夫官有染指之私法。必不行于下。于是衙役勢豪挾官肆惡。有本身原
無柳料。而代包料斂者。有己身應納料銀。止報虛文。毫釐不納。不怕河官里老。不爲遮蓋彌縫者。有小民
交料赴廠。而吏胥廠老勒捐不收。橫索使費者。始因料價不給於民。後致柳價反累於官。上下朦朧。止徒
苟且塞責。如此而欲河工有裨。民力稍甦。此萬不得之數也。養癰遺害。勢必大患於河。河患而漕亦病矣。
今與紳衿士民公議。嗣後辦料。原照往例於正月內。責令州縣按里公派。使之完納。迨伏秋以後。通計各
州縣實在完解柳料若干。應領價值若干。卑職照庫平印發州縣。取具印領。州縣將銀貯庫。不必分發里
老。里老不必分給花戶。但照各里分完料數目。扣抵各里分未季錢糧。止綸庫收。不見銀錢之黑白扣者。
無所容其扣而侵者。亦無所肆其侵。則下之納于上者。秋毫皆入。正供上之給于下者。錙銖悉沾。實惠而
勢豪惡棍。見其無隱可乘。亦不復萌代包妄派之思矣。此納料抵糧之法。極便于民者也。但須憲示嚴飭。
庶可永遠遵行。若夫工食之積弊。尤甚於料價。按夫一名。官給工食銀十兩八錢。因不足用。里下議出貼
費。各縣照里均差。約田數十頃。派夫一名。田多者應夫。田少者貼費。此徐屬歷年定例也。但有田之人。非

屬紳衿。卽各衙門吏書人役。本身不能應夫。勢必雇人替代。卽百姓之少有身家者亦然。是里下出夫之人。並非河上做工之人也。其間有名雖僱人代役。而實無人上工者矣。有本身原無夫役。而以一人而包充數夫者矣。州縣止送花名一冊。其事已完。真假替冒。何從詰辨。于是規避私逃等弊。不能免矣。是紙上之人。夫半屬虛名。而河干之修築。全爲故事也。至於給散夫食。舊例州縣解銀到廳。收貯徐庫。徐庫不敷。又領諸淮庫。先呈申河工部驗封。然後按季發之河判。河判分發夫頭。以及散夫。其中蠹役剋除。以及夫頭冒銷等弊。又倍於料價。甚至無夫之積棍。反受多金。而應役之貧民。纖毫無得者矣。今從長酌議。若照料價新規。令印官扣抵錢糧之數。似屬妥便。但此項銀兩。奉有給應河夫之旨。孰敢更張。是以不便抵還里。遞如仍前給放。又恐朝廷有惠窮夫不得親沾。再四籌畫。莫若求憲臺出示申飭。此後解夫之日。嚴責印官。不得以花名虛冊塞責。必令詳開應值夫役。本戶何人。實係何人代役。註明各夫年貌。如有代包規避等弊。立拏本戶重懲。及按季放發夫食之時。仍令印官親同河判。照原冊按名給發。仍具州縣與河官。公同放過領狀。並各夫領銀甘結。報上開銷。倘有給放不實。與包夫規避等情。一經發覺。官卽題參。蠹役勢惡。立置嚴法。庶人夫方得實用。而雨露不致空施矣。緣係職守所關。是用冒昧籲請。伏乞憲臺鑒

察施行

安插河夫

大梁沈繹堂諱松江人
巡憲

一調散夫役。宜稽查安插也。里下僉夫。半係鄉愚。機魯若盡。令親身赴工。省費既多。竣工必速。乃聞鄉夫上工。每被夫蠹凌虐。始而逼之使逃。旋復指逃勾詐。其勢遂有不得不雇覓者。獨是雇覓之夫。又係四方遊棍。或縱酒聚賭。虛應逍遙。或晝事舂鋤。暮爲穿窬。至秋後大工一完。糾黨行劫。到處流殃。如近日襄城獲解白玉山等盜案。與傍河州縣屢告失事。皆由平日工緊。則但徵夫數不暇問。其來歷工竣。則任彼星散。亦不窮詰其去向之故也。職愚以爲河夫聚散。關係盜源。豈可因循故轍。不一講求。合無懇請憲臺嚴飭各屬。俱着本處里夫親自赴工。不許夫棍圈謀代頂。卽有不獲已而雇覓者。亦須令夫頭歇家。各具甘結。內開某係某處人。現住某處。或下某店。并無奸宄等情。一投管河廳。一發本州縣存案。仍令各夫頭十名一結。一人爲非。衆人連坐。如是則調集在工之日。永無他患矣。至散工之後。一面發遣。一面行文該州縣着令點收歸籍。如有不到。卽係蹤跡可疑。本家慮禍及身。自能查覓。務在必得。如是則工完解散之日。亦無後慮矣。

酌減額夫

沈繹堂

一衝驛州縣宜酌減額夫也。河工重大勢必募夫而所派夫數似應分衝僻以均苦樂。查該省河夫近蒙河臺酌議計道里之遠近定地畝之多寡可謂至均且公矣。但就西路州邑如新鄉至新野許州至信陽因滇黔初定兵馬驛騷一應差使較往歲十增七八前職入覲曾將驛站事宜列款條奏業蒙撫臺垂軫將馬匹站銀酌議添補而各屬紛紛尙苦不能應付若河夫一項仍與偏僻州邑一槩僉派實有重累不均者合無懇請憲臺俯將各屬衝驛州縣之夫量行恤減或二三十名或十名十五名合計衝屬所減不過三四百名而在本處減去一名一月卽省六七兩一年卽省七八十兩之費事易功鉅較若列眉至所減之夫或不能全減仍酌補於附近僻邑裒多益寡悉出至公而彼此可無紛爭衝疲賴以甦息矣。

水利總

清佔開淤
築新補舊

疏河條議

江南
蕭憲
慕鶴鳴
諱天顏
陝西人

爲條議疏河救荒實政。仰祈憲裁亟賜會題請帑興工以垂永利事。竊惟三吳治水之功歷稽往績無他術也。惟使太湖之水導入江海而江海之潮汛亦可上通以時蓄洩則旱潦無虞自三江湮塞震澤汎

濫以田爲壑。遂致蘇松常諸州縣。以及浙西嘉湖杭三郡。受患日深。上年水災。瀾漫四野。數百里內。不第禾盡無秋。抑且室廬漂沒。流離疾苦。不忍繪圖。荷蒙憲臺軫念民生。首飭議濬劉河。以通水利。憲檄諄諄。謂蘇松嘉湖諸水大海大川。惟有黃浦劉河二道。黃浦見在通流。無庸復議。劉河海口淤淺。以致橫潰洪濤。又謂吳淞江出海之處。久成平陸。修復工繁。未可輕議。專力劉河。爲今日第一急着。此憲臺碩畫鴻謨。爲吳浙百萬生靈。造此無疆之福者也。本司遵行蘇松二府詳加確勘。茲據

云云

本司載考舊誌。披閱新

圖。按湖水之奔趨而東也。一自澱山泖湖。從華亭之南。折而東北入海者。爲黃浦。一自吳江長橋。歷長洲崑山青浦嘉定界至上海。合黃浦以入海者。爲吳淞江。一自吳縣鮎魚口。北入運河。經郡城婁門。注流上下雉瀆。抵崑山至和塘。東合新洋虬江。由太倉歸劉家港入海者。爲婁江。卽今之劉河也。迨吳淞入海之處。沙壅菱叢。昔夏忠靖公引黃渡以西之水。北入劉河。是今日劉河之一綫。爲松婁二江之尾閘。合蘇松諸郡之民命攸關者矣。濬之。寧可一日緩哉。但在蘇則亟望劉河之深廣。而崑太嘉爲尤切。在松則必圖吳淞之成渠。而上青諸邑爲最近。兩府所議各就其切己者而言。未可爲全局之通論也。本司規畫再三。採訪輿論。目前救時之策。在急疏劉河。將來遠大之謀。吳淞亦在必濬。蓋吳淞實太湖洩水之中條。其故

道較劉河更闊。其地勢較劉河更直。江浙六郡同其利。議協于浙。可冀旦夕成功。故夏忠靖之導松入劉河。白泖直注江海。仍濬范家浜以接黃浦。周文襄之立表開江。又修復劉港邊海諸河。崔撫院之濬大盈。鑿下界兼濬浦匯新涇。海忠介之專開吳淞。又別通白泖。總以太湖之水源多而勢盛。一江不足以洩之下。流海口患於合而利於分耳。然而今日民窮財盡。更際凶災。兩工決難並舉。劉河處其易。吳淞處其難。莫若棄吳淞而獨事劉河之爲便。本司細詢紳民父老。劉河之功固自不小。而吳淞亦有不得不次第並浚者。當日導淞水併入劉河者。有崑山之下界。嘉定之顧浦。以及鹽鐵新洋虬江諸港。浦淞與劉相通也。今則諸港浦盡塞矣。淞自爲淞。婁自爲婁。劉河雖開止洩。震澤半面之流而匯納於泖。澱以奔湧。松江者仍未得宣通也。若曰再開蒲匯新涇。重濬虬江顧浦。費力於支河小港。何如併力於吳淞乎。海公奏議曰。吳淞江開。六府均蒙其利。塞則六府同受其害。誠哉可信。已從來以工役救荒。使貧民食力以餬其口。如范文正守郡時。吳中大饑。發粟募民。諸工畢舉。以是公私仰給。民不流遷。蘇文忠鑿西湖于凶歲之後。無不共循此意。蓋小民至困苦中。工力必賤。且饑寒迫身。民多思盜。河工興而樂趨。畚插盜賊亦可潛消。荒政之施莫此爲大。然必須咨商浙江督撫。早爲區畫。將全局會疏。題明。共計劉河吳淞工費。在今先開。

眞誠愷切
當與海疏
並傳然先
生居官之
廉任事之
勇撫民之
慈表率屬
僚之嚴且
介無一不
肖海公非
止疏河一
事而已也
眞千古上
載

劉河待有秋冬涸之日。旋興吳淞大工。本司管窺如是。未識有當於憲衷否也。然則所急惟在錢糧。今遭
災荒之後。杼軸既空。不得不請銷正賦。但朝廷方在蠲災詘餉之時。又何敢言動帑。惟念興水利而後
有農功。有農功而後裕。國計若惜一時之費。不作久遠之圖。將來海口泥沙日淤。一日并劉河之涓流
亦塞。必致水災。洊告遇災荒而一歲且蠲數十萬積累而往。奚啻虧朝廷萬萬之額。今合兩工。不過暫
缺十四萬金。較之一歲所蠲。尙未及其半。而田工無患。國賦常充。可垂千百年之大利。一勞永逸。功在
斯時。考海忠介開吳淞之疏。留漕十萬石。佐以協濟稻穀贓罰。不兩月而功成。倣其遺謨。請憲臺俯賜會
題於蘇松常。康熙九年折漕銀內。暫留四萬兩。以應劉河夫工。康熙十年折漕銀內。再留五萬兩。浙省錢
糧協濟五萬兩。以應吳淞夫工。仍比歸仁堤事例。兩省續開。援納捐助。請于河工告成之後。補此漕折錢
糧。方行停止。卽於是月一面擇吉興工。至於估料計工人夫監督諸事。本司細核府廳詳議。尙多未協。謹
先就劉河工程。繕析條議。繪呈憲覽。

覆撫院條陳之一

汝寧彭燕又諱實
司李彭燕又諱實
華亭人

一曰水利。夫天地之有江河。猶人身之有血脈。宜流通不宜壅阻。一也。豫省自患河決。歲耗朝廷無算

金錢費窮簷無限民力。至今迄無安瀾。論者曰。河性喜順道。不喜逆遇。故以神禹治水。止言疏引以入海。未見障之使倒流。卽盤庚去禹未遠。亦止聞遷徙以避之。未嘗築堤以防之也。所以障之防之者何。曰。國家數百萬之飛輓。取道於河流故也。但歲歲決。因歲歲修。處處決。亦處處修。竟不知稽天震怒之勢。非土木畚插之功。可以底績。故雖瘠國疲民。識者病焉。而職未敢以爲然也。若夫各屬水利之應濬。則有不容不亟講者。職筮仕五月。屢以會訊欽件。往來各屬。知兩河之民。濱河而居者。水驛通支流。接薪水田禾。猶得灌溉汲取之利。他自兩河以南。則千里斥鹵。兼以民多流亡。地多榛莽。卑職匹馬所過。一望砂磧。此無論墾種無民。漸成石田。卽今久奉招徠墾種。室廬盡廢。豈能霜宿露棲。必須議通水道。招集木商。卽不能起豎房屋。亦庶幾搭蓋蓬廠。芴茨自蔽。承種開墾。若水道一日不通。木商一日不至。豈能使鬻鬻子遺。越疆卽卽取材於千百里之外乎。是木材一日不至。窮簷一日無居。窮簷一日無居。流移一日不歸。流移一日不歸。開墾一日無望。竊恐墾者尙漸爲荒。荒者安望其墾。是水利之益實與屯政兼之者也。況河工一舉。所有挑運勢必召募河夫。各屬貧黎。或在隣省傭工求活。或在遠方趁食偷生。聞有開濬之役。必歸故土。以應募。是疏通水利之中。又寓招集流亡之意。他日河工一竣。挑運之泥夫。卽耒耜之農夫。一舉而衆。

善備焉。至於十丈之城。百丈之淵。所謂金城湯池。設險以固圉者。今則曾無涓涓之細流。卽以汝寧論。汝固以汝水得名也。向有河流故道。從汝達於上蔡。從上蔡達於郡城。今則陵谷變遷。河身已作高原。用是舟楫斷絕。商賈裹足。貿易不至。塵市空虛。尙欲熙熙者在野。攘攘者在市。其可得哉。職敢請憲臺垂千百年之永利。澤數億萬之生靈。檄行各屬。當此三空四盡。不能概議疏濬。酌議城濠險要。田禾潤澤。商賈往來之所。向有故道可循者。據實開報。聽候憲臺委官覆勘。係官占者官濬。民占者民濬。特疏具題。酌議舉行。約計歲月。便可告竣。田疇無水旱之患。城池有高深之險。商賈有輻輳之期。不費國帑之金錢。而垂地方無窮之利賴矣。

審定水口詳文

漢中
司李曾道扶
諱玉孫
秀水人

看得油浮湃爲五門堰八湃之一。而上板堰陡渠堰。則又油浮湃內之上游下流也。湃內田三千三百畝。自上板而下。爲堰凡六。灌溉之利。其蒙業相安者。蓋自有此堰。以至今日矣。尹官等因昨歲亢陽。怨澤不下逮。倡照夫使水。每夫一寸四分之說。汪養龍等遂以變壞古制。紛紛訐告。念係國稅。民命所關。非親歷閭難。以定案。因單騎窮詣六堰。查驗向來水口有用石條者。有用平木者。上板堰水口六尺七寸。其東

渠并余福洞共二尺三寸。西渠一尺八寸五分。皆係古制。渠頭許輔等堰長田世祿胡義等衆口一辭。卽尹官亦供向來如此也。則西渠三寸五分。東渠七寸八分之非古制明矣。卽尹官等陡渠堰。古制原係二尺三寸。東邊南渠亦係五尺。東邊北渠亦係一尺六寸。西邊渠亦係一尺一寸。若以上板堰兩渠舊制爲汪養龍等私增。則陡渠堰三渠又誰爲增之而寬闊若此乎。至每夫一名水口一寸四分之說。稽之水冊。旣不曾載。繙閱夫簿亦無此項。尹官等詞內據以爲證者。堰長田世祿并徐典史。工房左元贊也。乃田世祿供云不知。徐典史謂出之尹官等之口。左元贊亦供不知。及細訊之尹官。且更茫然。夫油浮湃水田凡三千三百畝。其間廬野而托業者。疇不仰望此水以稼以穫。輸將於是乎出。俯仰於是乎足。顧以數人無稽之論。一旦變壞古制。爭端一起。數世不止。誠非地方之福也。蓋古人立法自有深意。若非盡善。何能經久。今據各渠頭所報水口舊制。合之輿論。允宜遵守。尹官等私意紛更。本當重擬。姑念悔過。均杖以警。汪養龍等所稱上板堰正湃水口。原係四尺八寸。爲尹官等添夫加增一尺九寸。今審相沿已久。又無鑿據。姑照六尺七寸。不許再起訟端。查六堰上下各渠水口。或係平木。或係石條。今議除去平木。俱用石條。悉照古制。尺寸底用石板。高低悉照本堰。不得過低。蓋上板等堰在上。陡渠堰在下。旱歲不無偏苦。若上下

渠曰渠底修理無弊便可永息爭端另造舊制水口冊一本仍請詳示勒石堰傍以垂永久則憲澤與渠水長流而斯民世世賴之矣

築堤詳文

安陸馬翰如諱逢臯
郡丞宛平人

爲築新必須補舊懇乞通行沿江地方各立堤長堤甲編造烟夫以固堤防以全民命事切照安陸一郡襄江水面高于湖田春夏水漲堤防不固田產廬室竟付波濤國計民生兩受其困故曰此處以堤爲命防堤甚於防盜盜之爲害不過一家二家以至數十家而止堤口一決洶猛奔溢不知幾千里也蒙各

憲臺留心國計軫念民生於順治十一年十月內委職修築卑職於十三處決口俱經歷到見其傾圯

崩塌者固多而低矮卑薄雖云未壞已有必壞之勢者亦正復不少若止築新而不補舊此處纔完彼處復決徒竭官心民力無抵於巨浪洪波非勝算也治堤有如治癰左潰右潰總是一潰與其備藥待數不若消弭其毒使之不潰之爲愈也如某某某等地方不下數十百處凡此皆就卑職巡歷所及者而言其餘未知未見者又不知凡幾矣除已行州縣委官差役幫補修築外其應行事宜請略陳大槩數年以來州縣印官俱以籌需措餉爲重佐貳管水利官又有催辦解運等事羈身未及分心堤務有緊急潰決

之口。卽爲修築。亦不過急則治標而已。圩長一年一換。止圖了事。經承承票坐差。志在打錢。竭有限之民膏。填無窮之巨壑。此修彼決。害無已時。雖云洪水爲災。亦人力不竭之所致也。故此處州縣等官。十分精神。當用六七分於堤工之上。有堤然後有田。有田然後有耕穫。有耕穫然後上完國賦。下養民生。不然民窮財盡。州縣官卽有經濟。當於何處施之。或曰軍需爲重。固不知堤壩一節。乃軍需所從出也。故卑職有築新必須補舊之議。補舊之法云何。一曰立堤長。二曰立堤甲。三曰編定就近烟夫。四曰嚴州縣印佐等官考成。夫修堤官事也。何用立堤長。堤甲及烟夫。止因州縣印官政繁事冗。無暇巡歷。佐貳管水利官。亦有解運催糧等分役。平時不暇查閱。及至堤決往視。則已晚矣。至於經承坐差。則皆以有利而爲。未可以此事信任之也。必選近堤百姓。田多殷實者爲堤長。人情無所利益。多不樂爲。必免本家一切差徭。如採買解運勾攝幫費之類是也。每一堤長管五堤甲。堤甲選有中人之產。年力精壯者充之。亦免本家差徭。一堤甲管十烟夫。烟夫亦免本家差徭。此等鄉民初必畏而不前。若見州縣官果免差徭。特示優異。勢必爭充而競進矣。每五里立一堤長。一里立一堤甲。十烟夫分派段落。汎地有事。則齊集救護。無事則更番看守。不時剗伐荆棘。補傾塞頽。小工自做。大工飛報該管衙門。於烟夫之外。另起人夫幫做。已報不修。

官司之過。應修不報。堤長堤甲之過。長甲應修不報。卑廳及州縣官。徑行拏處。卑廳及州縣官。聞報不修。各上臺。卽行糾治。倘州縣官不聽約束。許卑廳揭參。卑廳督催不力。聽上司參處。苟稱厥職。卽以此定其考成。五里以至百里。百里以至千里。人人如此。處處如此。有事救護。無事加幫。服藥于未病之先。消癰於不潰之日。因時補塞。逐年加幫。行見高者益高。厚者益厚。集衆力爲隄防。合沿江無缺漏。雖有狂瀾巨浸。如天塹。何卽或小有傾頽。亦不過零星數處。決不似今歲之在在皆崩。口口待塞也。至于修堤之舉。或應獨修。或應協修。或按畝起夫。或按糧起夫。受害之處宜多派。不受害之處宜少派。道府公議。一報卽定。九月做起。年終限完。失事之堤甲長。該州縣官並水利官。與該經承。各治以罪。如此則法嚴堤固。一勞於前。而永逸於後矣。何至如決信一聞。倉皇失措。以權授之吏胥。聽其舞弊。輕重在手。民田止造里耕。官田止造總甲小甲。不列花戶姓名。貧懦者雖數十畝不免。豪強者卽千百畝亦漏。每打堤一次。徒爲奸蠹作生涯。折夫入己。修築不堅。則下年又有事做。故以堤決爲美事。官民之災異反爲若輩之禎祥也。此勵官禁蠹之法。所當先計。至于鄉紳舉貢生員。及各衙門差承書吏。又不能無說焉。如選立堤長堤甲烟夫。吏書差承一身。難充三役。本身應免編派。紳衿舉貢生員。當示優禮。各本身亦免編派。然止免本身。其族

人家人及佃戶。槩不准免。此就選編堤長甲長烟夫而言也。若夫堤潰口決。事出非常。自當別論。或應獨修。或應協修者。則不論紳衿衙役。俱按田出夫。不免編派。每田五十畝。每糧一二石。出夫一名。修堤不比他事。爲時止有三冬。春水一至。卽有工不能施矣。故用工宜力。督工宜嚴。視三冬爲一日。急急趨成。始不債事。卑職歷任十月。博稽旁探。以及身歷親嘗。而始成此愚論。非臆說也。卑職前議。欲派沿堤殷實之家。季出工食。給堤甲長。爲守堤心力之資。徐思日久。弊生後人。不知立法本意。指公爲私。徒滋口實。今熟思之。惟有沿堤徧栽楊柳。及各種易植之樹。俟其長大。聽各堤長堤甲。砍作柴薪。官不得取。民不得伐。一則俾管堤之人。稍有益。而不致徒勞。一則令樹根盤結岸土。益堅永無崩塌之患矣。卑職仰體各憲臺爲國爲民之至意。矢此愚衷。爲地方做此實事。仰祈憲鑒。行府再爲酌議。擇其可取者。鏤板傳示。以便永遠遵行。則補苴一得之愚。可益神聖之深邃。其於國計民生。似亦不無小補也。

鹽法一 禁私販

牌行運道

爲酌議定例。以便商運。以杜私販事。照得疏商裕課。首在禁私。然禁私之源。尤在產鹽之地。場無私賣。何

兩淮
鹽院李公弼
諱贊元
山東人